

Carta naçahyí Pablo nuú na cúú cuéntá Jesús ndúu ñuu Efeso

Chíndahá Pablo Ndióxi coo na cúú cuéntá Jesús ndúu ñuu Efeso

1 Yehe cúú Pablo, da naçaxi Ndióxi cacuu apóstol cuéntá Jesucristo. Cáhyí i carta yóho nuú na cúú cuéntá Ndióxi ndúu ñuu Efeso, na cándeé ini Jesucristo. ²Ña cúní queá ná caja Ndióxi, tátá yó xihín Jesucristo, xitoho í cuahá ñamaní xihín ndó ta ná caja mé á ña ná coo vaha ini ndó.

Ñehe táhvi yó cuahá ñamaní cája Ndióxi sahá ña cándeé ini Jesucristo

³Cóho caja cáhnu í Ndióxi, mé a cúú tátá Jesucristo, xitoho í. Cóho caja cáhnu í mé á jáchi cuahá ndivaha ñamaní naçaja xoho. Ta tá nuú ña vaha quíxi indiví nasahan ndihi mé á nu yó jáchi in cúú yó xihín Jesucristo.

⁴Janda tá cámaní cava sahá saha ñuyíví já naçaxi Ndióxi mí ña ná cacuí cuéntá mé á sahá ña naçaja Jesucristo. Ta nasacu ini a ndaja mí ña ná cacuí ñayivi yíi, na coó ga cuachi nu mé á. ⁵Quíhvi ndivaha ini a mí sahá ña cán queá sa nasacu ini mé á ña ná quivi Jesucristo saha yó já ná nduú jahyi mé á. Já naçaja jáchi já cúní a coo. ⁶Sahá ña cán queá ndítahan nu yó caja cáhnu í Ndióxi ní tiempo jáchi cuahá ndivaha ñamaní cája mé á xihín yó tá naçaja mé á ña in nanduú xihín Jesucristo, jahyi mání á.

⁷Naçaja Ndióxi ñamaní cáhnu xihín yó tá naxita nii Jesucristo ndica crúxu saha yó. Anda jáví cuu jácacu a mí ta cuu caja cáhnu ini a sahá cuachí.

⁸Mé a ndaa naçaja cuahá ndivaha Ndióxi ñamaní xihín yó. Naçaja mé á ña ná ndindíchi jini yó já ná candaa iní tūhun mé á. ⁹Ta nasahan ñamaní nu yó ña ná candaa iní ña nasacu ini mé á caja jáchi janda sanahá nasahiin jehé a nu yó joo viti sa cándaa iní ndá saha nachindahá mé á Jesucristo.

¹⁰Ta vaxi quívi coo ña nasacu ini mé á coo. Ta mé quívi cán caja Ndióxi ña ná cacomí Jesucristo cuéntá saha tóco ndihi ñaha ndúu ñuyíví xihín ña ndúu indiví jáchi tóco ndihi ñaha xinu a canduu a ndáha Jesucristo.

¹¹Ta coo tá quiahva nasacu ini Ndióxi coo jáchi cája mé á tóco ndihi ña sácú ini a caja. Janda sanahá ndivaha nasacu ini a çaxi a mí cacuí ñayivi ñehe táhvi ndiquehé ña vaha, ña quíxi nu íin mé á sahá ña in nanduú xihín

Jesucristo. ¹²Sahá ña cán quéa ndítahan nuú nde caja cáhnu nde Ndióxi ña ná naha ndaja cáhnu cúu mé á jáchi jihna ñúhú nde ñacasáha cándeé ini nde Jesucristo. ¹³Ta quiahva já ñacaja ri ndóhó va jáchi tá naxini johó ndó ña ndaa sahá Jesucristo já ñacandeeé ini ndó mé á. Mé tuhun yóho najánaha nu ndo ndá quiahva najácacu mé á ndohó. Ta tá ñacandúsa ndó a já in nanduu ndó xihín á ta cúu á tátuhun nanani marca Ndióxi ndohó ña náha ña mé a ndaa cúu ndó cuéntá mé á. Ta mé marca yóho cúu ínima yíi mé á ña ñasahan tuhun a nu ndó quiahva nu ndo. ¹⁴Ta ndácaan ínima yíi mé á ini ínima yo sahá ña cán quéa cándaa vaha iní ña vaxi quívi ndiquehé ña vaha, ña quiahva Ndióxi nu yo jáchi sa ñasahan mé á tuhun a caja ña. Ta sa já ndácaan ínima yíi mé á ini ínima yo janda quiahva ná xinu quívi jácacu a mí nuú cuachí. Sahá ña cán quéa cóho caja cáhnu í mé á ña ná naha ndaja cáhnu cúu mé á.

Xíca tahví Pablo nu Ndióxi ña ná quiahva mé á ña ndichí jini na cúu cuéntá Jesús

¹⁵Ta sahá ña sa cándaa vaha ini i ña cándeé ini ndó Jesucristo, xitoho í ta sahá ña sa cándaa ini i ña quíhvi ini ndó tóco ndihi na cúu cuéntá Ndióxi ¹⁶sahá ña cán quéa co jándacoo i ña ndíquiahva i ndixahvi nu Ndióxi saha ndo. Ta co ndíndójó i caca tahví i nu Ndióxi saha ndo. ¹⁷Ta tá xíca tahví i nu Ndióxi, mé a cúu tátá Jesucristo, xitoho í, mé a cúu Ndióxi cáhnu ndivaha já xíca tahví i nu á ña ná quiahva ínima yíi mé á nu ndó. Anda já caja mé á ña ná ndindichí jini ndo já ná naha ndaja cáa Jesucristo. Ta xihín ña yóho candaa vaha chága ini ndó saha mé á. ¹⁸Ta xíca tahví i nu Ndióxi ña ná jándiyehé a xíní túní ndo já ná candaa ini ndó sahá ña vaha caja mé á chága chí nuu xihín ndo. Ta ñúchí ndivaha coo tá ná xinu quívi ndiquehe Ndióxi ndohó cuhun ndó coo ndó xihín mé á anda ama cáa quívi sahá ña cúu ndó cuéntá mé á. ¹⁹Ta xíca tahví i nu á ña ná candaa ini ndó ña co vája xinu coo nu ndíhi ndée Ndióxi jáchi íin ndivaha ndée mé á. Ta íin mé ndée yóho tañu mí, na cúu cuéntá mé á. Ta sa mé ndée yóho quéa ñacaja chúun Ndióxi ²⁰tá najánditacu a Jesucristo. Anda jáví ñasacu coo a ña xoo cuáha mé á indiví. ²¹Ta ñacaja Ndióxi ña ná nduu Jesucristo jini nu tóco ndihi na íin ndée cahnda chuun ñuyíví yóho xihín na íin ndée cahnda chuun indiví. Sáhndá Jesucristo chuun nu tóco ndihi na cán vatí cúu ná na ndúu tiempo viti á cúu ná na vaxi chága chí nuu. ²²Tóco ndihi náha ndúu indiví xihín ñuyíví nandiquiahva Ndióxi ña ndáha Jesucristo ña ná cacomí mé á cuéntá sahá. Ta sa mé á cúu á jini nu tóco ndihi na cándeé ini mé á. ²³Ta tóco ndihi na cúu cuéntá Jesucristo cúu ná tátuhun yiquí cuñu mé á sahá ña nandicutú ndaa ínima ná xihín mé á. Ta mé a cán jáchutú a tóco ndihi na ndúu ñuyíví xihín indiví.

Najácacu Ndióxi mí jáchi quíhvi ini a mí

2 Ta jihnanasacuu ndó tátuhun na sa naxihí jáchi nasacaja ndó cuahá cuachi. Joo viti cúu ndó tátuhun na nanditacu tucu jáchi Ndióxi najácacu ndohó. ²Ta nasacaja ndó tá quiahva cája ñayivi ñuyíví yóho. Ta nasacaja ndó ña cúní tiñáhá sacuahá, rí cúu jini nu tóco ndihi rí quini. Ta mé rí cán cómí rí cuéntá sahá ñayivi, na co cája ña cúní Ndióxi. ³Ta quiahva já nasanduú jihna jáchi nasacaja í ña xíca ini mí ví ta nasacaja í tóco ndihi ña núu, ña nasacahvi iní caja í. Ta saha tóco ndihi ña núu nacaja í yóho nanditahan nu yo jándoho ndivaha Ndióxi iní tá quiahva cája mé á xihín java ga na co cúní candúsa mé á. ⁴Joo natahvi ndivaha ini Ndióxi saha yo ta naquihvi ini ndivaha mé á mí. ⁵Ta vatí nasacuú tátuhun ndii ta coo nacuu ndique táhan mání yó xihín Ndióxi sahá cuachi nasacaja í joo natahvi ini Ndióxi saha yó sahá ña cán quea najácacu a mí sahá ña nacaja Jesucristo. ⁶Vatí nasacuú tátuhun ndii sahá cuachi nasacaja í joo tá nanditacu Jesucristo já nasacuu a tátuhun nanditacu yó xihín mé á nacaja Ndióxi. Ta nacaja mé á ña ná cacoo í xihín Jesucristo tá ná xinu coo í indiví. ⁷Nacaja Ndióxi ña yóho jáchi nasacu ini a jánaha nu yo viti xihín chága chí nuu ña quíhvi ndivaha ini a mí ta táhvi ndivaha ini a saha yo sahá ña nacaja Jesucristo. ⁸Ta sahá ña natahvi ini Ndióxi saha ndo ñañehe táhvi ndó cacu ndaa ínima ndo jáchi cándeé ini ndó mé á. Ta co cúu á sahá ña cája mé ndó jáchi cúu á ñamaní nacaja Ndióxi xihín ndo. ⁹Ta coo najácacu a ndohó sahá ña vaha cája ndó jáchi co cúní a ña ná caja cáhnu ndó mé ndó. ¹⁰Jáchi nacavaha Ndióxi mí tá quiahva cúní a ña in ná nduú xihín Jesucristo já ná caja í ndinuhu ña vaha, ña nasacu ini a caja í anda jihna.

Íin vaha iní sahá ña nacaja Jesucristo xoho

¹¹Candehé ndó, na tóho, na cúu cuéntá Jesús. Ná ndicuhun ini ndó ndaja nasacuu ndó jihna. Nacachi na Israel saha ndó ña coo yahvi toho ndó jáchi coo nachicaan na marca yiquí cuñu ndó. ¹²Ndítahan ndicuhun ini ndó ña mé tiempo cán co xini toho ndó Jesucristo. Ta ni coo nasacuu ndó na Israel, na nacaxi Ndióxi. Ta ni coo nasacuu ndó ñayivi nasahan Ndióxi tuhun a nuu. Nasanduú uun ndó ñuyíví yóho jáchi coo nasaxini ndo Ndióxi ta ni coo nacahán ndo cuhun ndó indiví. ¹³Vatí coo nasacuu ndó na cúu cuéntá Ndióxi joo viti nacayati ndó nu á ta já in nanduu ndó xihín Jesucristo sahá ña naxihí a ndica crúxu saha ndo. ¹⁴Ta nacaja Jesucristo ña ná coo vaha ini na Israel xihín na tóho. Ta nacaja ña in nanduu na cuéntá mé á. Jáchi najándihi á sahá ña nasaji nuu nuú na cán ña ná ndique táhan mání xihín táhan na. ¹⁵Ta tá naxihí Jesucristo najáxinu coo a nu ley ña

nasahnda chuun nu yo sahá ña nanditahan caja í. Ta nandaja mé á ña in nanduu na Israel xihín na coó naquixi chichi Israel. Ta tá nandihí já nandaja mé á ña nanduu na cuéntá mé á já nanduu vaha ini xihín táhan na. ¹⁶Tá naxihí Jesucristo ndica crúxu já nacaja mé á ña ná ndique táhan máni xihín táhan na ta já nandihí sahá ña cáni táhan na. Anda já najándique táhan máni á na xihín Ndióxi ta já in nanduu na.

¹⁷Ta naquixi Jesucristo caxi tuhun a tuhun vaha nu yo ña ná coo vaha iní xihín Ndióxi. Ta coó caja toho a á cúu ná na tóho, na nasacuu xíca nu á tátuhun mé ndó, á cúu ná na Israel, na nasanduu yati nu á tátuhun mé nde jáchi nasahan mé á tuhun vaha nu tóco ndihí. ¹⁸Ta sahá ña nacaja Jesucristo cuu cayatí nu Ndióxi viti. Coó caja toho a á cúu yó na naquixi chichi Israel á co cúu yó na naquixi chichi Israel jáchi ínima yíi mé á quéa chindeé a mí cayatí nu Ndióxi. ¹⁹Sahá ña cán quéa co cúu ga ndó na tóho, na naquixi xíca jáchi in nanduu ndó xihín na cúu cuéntá Ndióxi viti ta cúu ndó na vehe mé á. ²⁰Ta viti tóco ndihí, na cúu cuéntá mé á cúu yó tátuhun in vehe. Ta na apóstol xihín na profeta cúu ná tátuhun yuu ndúhu sahá vehe jan jáchi najánaha na tuhun Ndióxi nu ndó nu cuítí. Ta Jesucristo cúu á tátuhun yuu ndúhu cuahan titó vehe jan ña sahan ndée vehe jan. ²¹Ta nacaja Jesucristo ña nandique táhan vaha tóco ndihí na cúu cuéntá mé á. Ta nandaja mé a mí ña loho loho ná nduú tátuhun in veñuhu yíi nu sá ndacaan Ndióxi, xitoho í. ²²Sahá ña in nanduu ndó xihín Jesucristo sahá ña cán quéa nandique táhan máni xihín táhan ndó. Ta nacaja Ndióxi ña ná nduu ndó tátuhun in vehe nu íin Ndióxi jáchi ndacaan ínima yíi mé á chí ini ndó.

Nachindahá Ndióxi Pablo cahan da tuhun mé á nuú na coó naquixi chichi Israel

3 Yehe cúu Pablo ta sahá ña xíca nuu i cahan i tuhun vaha sahá Jesucristo nuú na coó naquixi chichi Israel saha ña cán quéa ndacaan i vecaa viti. ²Ta sa cándaa ini ndó ña sahá ña natahvi ini Ndióxi saha ndó sahá ña cán quéa nasahan mé á chuun yóho nuú i ña ná cahan i tuhun Ndióxi xihín ndo. ³Jihna nachijehé Ndióxi ña nasacu ini a caja joo viti najánaha mé á nuú i ña nasacu ini a caja. Ta sa nacahan chá i sahá ña jan tá nacyí i carta nu ndo. ⁴Tá ná cahvi tucu ndó ña já cuni ndó ña mé a ndaa táhyí sa cándaa ini i ña nasahin jehé sahá Jesucristo. ⁵Coó nacandaa ini ñayivi ña yóho jáchi nasahin jehé ña. Joo viti nacaja ínima yíi Ndióxi ña ná cándaa ini na apóstol xihín na profeta, na cúu cuéntá mé á sahá ña yóho. ⁶Ta ña nasahin jehé jihna cúu ña yóho: xihín ña nacaja Jesucristo ña in nanduu na cúu chichi Israel xihín na co cúu chichi Israel já ná ñehe ná ña vaha ña nasacu ini Ndióxi quiahva nuú na cúu jahyi mé á. Jáchi in

nanduu na Israel xihín na tóho ta in cúu ná ndáti na ñehe ná ña nacachi Ndióxi quiahva nu ná sahá ña nacaja Jesucristo.

⁷Joo nacaja Ndióxi ñamaní xihín i ta xihín ndée mé á xíca nuu i cáhan i tuhun vaha sahá mé á nuú ñayivi. ⁸Nacaja Ndióxi ñamaní xihín i jáchi nasahan mé á chuun yóho nuú i ña ná cahan i tuhun vaha sahá Jesucristo nuú na coó naquixi chichi Israel. Vatí cúu u tátuhun in da coó sahá tañu na cúu cuéntá Jesús joo nacaja mé á ñamaní xihín i ña ná ndicani i nuú na tóho ndá quiahva náhnu nahá cája Jesucristo xihín ná. ⁹Ta nasahan Ndióxi chuun nuú i ña ná jánaha i tuhun vaha ña nasahiin jehé nuú ndihi ñayivi. Ta anda sanahá nasahiin jehé a nacaja Ndióxi, mé a nacavaha tóco ndihi ñaha. ¹⁰Nacaja Ndióxi ña yóho jáchi sahá ña in nanduu na Israel xihín na tóho anda jáví náha nu tóco ndihi na sáhdá chuun nuú na ndúu indiví ndá quiahva ndíchí ndivaha jini mé á. ¹¹Sanahá ndivaha nasacu ini Ndióxi ña yaha chága chí nuu. Ta viti xihín ña nacaja Jesucristo, xitoho í naxinu coo nuú ña nasacu ini mé á coo anda ama cáa quivi. ¹²Ta sahá ña in nanduú xihín Jesucristo sahá ña cán quéa co yíhvi ga í cayatí nu Ndióxi. Ta xini vaha í ña ndiquehe mé á mí jáchi cándeé iní mé á. ¹³Sahá ña cán quéa xíca tahví i nu ndo ña ná a cávitá ini ndó sahá ña ndóho ini i. Jáchi sahá ña nacahan i tuhun Ndióxi nu ndo sahá ña cán quéa ndóho ini i viti já ná cuu canduu vaha mé ndó. Ta xini ñúhú cajii ini ndó sahá ña cája i saha ndo.

Quíhvi ini Jesucristo ñayivi

¹⁴Sahá ña cán quéa ndáca xítí i nu Ndióxi, mé a cúu tátá Jesucristo, xitoho í tá cáhvi ini i ndá quiahva náhnu cája mé á. ¹⁵Jáchi mé á cúu tátá tóco ndihi na ndúu indiví xihín tóco ndihi na ndúu ñuyívi yóho sahá ña cúu ná na vehe mé á. ¹⁶Ta cuni mé á caja cuahá ndivaha ñamaní xihín yo sahá ña cán quéa xíca tahví i nu á ña ná chindahá ínima yii á nu ndo já ná quiahva tuhun ndeé ini ndó ta já ná coo ndacú ini ndó. ¹⁷Ta xíca tahví i nu Ndióxi ña ná ndacaan Jesucristo ínima ndo sahá ña cándeé ini ndó mé á ta ná coo ndeé ini ndó sahá ña quíhvi ini a ndohó. Ta tá quiahva tíin yohó yíto ñundáhyi quiahva já ndítahan coo ndó xihín Jesucristo. ¹⁸Ta anda jáví mé ndó xihín tóco ndihi na cúu cuéntá Jesús cuu candaa ini ndó ndá quiahva quíhvi ini a ndohó. ¹⁹Ta xíca tahví i nu Ndióxi ña ná candaa ini ndó ndá quiahva quíhvi ini Jesucristo ndohó já quéa ná ndicutú ndaa ínima ndó xihín Ndióxi. Joo mé a ndaa a cuú xinu coo ndó candaa ini ndó ndá quiahva quíhvi ini a ndohó.

²⁰Ta viti cáhnu nahá ná cacuu Ndióxi, mé a íin ndivaha ndée cája cuahá nuú ñaha jáchi cája cuahá chága mé á ñamaní xihín yó a juú ga nuú ña cáhvi iní caca yó nu á jáchi chindeé Ndióxi mí xihín ndée mé á. ²¹Cóho

ndihí, na cúú cuéntá Jesús ña ná caja cáhnu í Ndióxi sahá ña nacaja Jesucristo. Viti xihín ndijáá ní quívi ta anda ama cá quívi ná caja cáhnu í mé á. Já ná coo.

Cája ínima yíi Ndióxi ña in nanduu tóco ndihi na cúú cuéntá Jesús

4 Yehe ndácaan i vecaa sahá ña cája chúun i cuéntá Jesucristo, xitoho í. Sahá ña cán quéa xíca tahví i nu ndo ña ná caja ndó ña cúni Ndióxi caja na cúú cuéntá mé á. Jáchí nacaxi a ndohó sahá ña cán quéa ndítahan caja ndó tá quiahva cúni mé á. ²Coto a cája cáhnu ndó mé ndó. Vii caja ndó xihín ñayivi. A cójo cama ini ndó xihín ná. Ta tá yáha nu cája xihín táhan ndó caja cáhnu ini saha táhan ndó jáchí quíhvi ini táhan ndó. ³Xíní ñúhú ndinducú ndo in ná nduu ndó jáchí chindeé ínima yíi Ndióxi ndohó caja ndó ña. Ta coto a ndacahnda táhan ndó já ná coo vaha ini xihín táhan ndó. ⁴Tóco ndihi mí, na cúú cuéntá Jesús naxinu coo í cúú yó tátuhun in túhún ñayivi. Jáchí íin in túhún ínima yíi Ndióxi iní ta in túhún cúú ri ña ndátí quiahva Ndióxi nu yo sahá ña nacaxi a mí ndiquehé ña. ⁵In túhún jini Jesucristo, xitoho í quéa íin. Ta in túhún jini mé á ndítahan candeé iní jáchí in nacanduta yo cuéntá mé á. ⁶Ta íin in túhún Ndióxi, mé a cúú á tátá tóco ndihí. Ta mé a cán cómi a cuéntá saha tóco ndihí. Ta sahan mé á ndée yó caja í ña cúni a. Ta ndácaan ínima mé á ini tóco ndihi ñayivi cuéntá mé á.

⁷Joo tá in tá in mí ñañehe táhvi yo nasacu ini Jesucristo quiahva nu yo. ⁸Sahá ña cán quéa cáchí tuhun Ndióxi já:

Naquee vaha mé á xihín na ihvi a ta nasandaca mé á na tá nandico coo a nandaa indiví.

Anda já nasahan tahvi nuú in in ñayivi, nacachi tuhun Ndióxi.

⁹Tá cáchí a ña nandaa Jesucristo indiví já cúni cachi a ña nu cuítí nanuu a indiví anda ñuyíví yóho. ¹⁰Ta mé Jesucristo, mé á naquee indiví cán ta nanuu a ñuyíví yóho nandaa tucu a cuahan janda nu jícó cuítí indiví ta já najándicutú a ñuyíví xihín indiví xihín ña nacaja mé á. ¹¹Ta tá nasahan tahvi nuú in in ñayivi já ñañehe táhvi java na cacuu na apóstol ta java na cacuu na profeta ta java na caca nuu na cuahan na tuhun Ndióxi ña cuu jácacu ñayivi. Ta java na ñañehe táhvi ná cacuu na na cómi cuéntá sahá na cúú cuéntá mé á ta java na cacuu na na jánaha tuhun Ndióxi nuú ñayivi. ¹²Já nacaja Ndióxi xihín na cán já ná canduu tiaha na caja chúun na cuéntá mé á ta já ná cuu caja na jácuahnu na na cúú cuéntá Jesús. ¹³Já quéa ná xinu coo ndihí in canduú xihín na cúú cuéntá Jesús sahá ña candeé iní mé á. Já ná cuu xinu coo í candaa vaha chága iní sahá Jesucristo, mé a cúú in túhún jini já jahyi Ndióxi. Ta xihín ña yóho cuu ndindacú yo cuéntá mé á janda quiahva cuahnu vaha í

jáxinu coo í ndicutú ndaa yó xihín mé á. ¹⁴Ná a cácuu ga í tátuhun na valí, na co tácu ini, na ndíjama jini tá too. Ta tá nandihí ndíco na jatá ña jánaha inga na janda quiahva jándahvi na na. Ta mé na jándahvi ñahá yóho xini vaha na ndá quiahva cája na cañehe na na cuhun na in íchi ña co cúu ichí vaha. ¹⁵Ña ndítahan caja í quéa cañan ndaa xihín táhan í xihín ndinuhu iní sahá ña quihvi ini táhan í ta já cuahnu í xihín Jesucristo, mé a cúu jini nu tóco ndihí na cúu cuéntá mé á janda quiahva ná nduú tá quiahva cáa mé á. ¹⁶Sahá ña cúu mé á jini nu yo sahá ña cán quéa cuu ndique táhan vaha í xihín java ga na cúu cuéntá Jesús. Ta ñúchi ndivaha ndique táhan na cúu cuéntá mé á tá cája in in na ña cuni mé á. Ta xihín ña yóho cuu canduu vaha í ta cuu ndindacú chága yó cuéntá mé á ta já cuu quihvi ini táhan í.

Ña saá cája í viti

¹⁷Ña yóho quéa cáxi tuhun i xihín ndo. Xíca tahví i nu ndó cuéntá Jesucristo, xitoho í ña ná a cája ga ndó cuachi tá quiahva cája ñayivi ñuyiví jáchi coo yahvi toho tá nuú ña núu cáhvi ini na caja na. ¹⁸Mé na cán nandaji xini túni ná. Ta co cúu ná na jácacu Ndióxi jáchi nachicaji na xini túni ná nu mé á ta nandaja táhyí na ínima ná. ¹⁹Co cácahan nuu ná jáchi nayaha va quiahva cája na ña núu xihín ndinuhu ini na. Ta co sáji nuu na nuú yiquí cuñu na tá cuni a caja tá nuú ña núu. ²⁰Joo tá nandiquehe ndó íchi cuéntá Jesús já najánaha nde ndohó ña ná caxoo ndó nuú cuachi tátuhun ña yóho. ²¹Jáchi naxini johó ndó saha mé á ta nandiquehe ndó tuhun ndaa, ña najánaha nde nu ndo, ña cáhan saha mé á. ²²Sahá ña cán quéa ndítahan nu ndó jácaxoo ndó nu tóco ndihí ña núu nasacaja ndó jihna. Jáchi cuachi quéa nacaja ndusa xihín ndó ña ná caja ndó ña núu ta játiví a ndohó sahá ña nandiava iní ndo caja ndó ña núu, ña jándahvi ndohó. ²³Xini ñúhú cacuu ndó na nanduu saá ínima xihín xini túni sahá ña cúu ndó cuéntá Jesús. ²⁴Ta xihín ña yóho cuu xinu coo ndó cacuu ndó tátuhun ñayivi saá, na cáa tá quiahva cáa mé á. Ta náha ña mé a ndaa táhyí cúu ndó ñayivi ndaa, na nandivií nu mé á.

²⁵Sahá ña cán quéa a cáhan ga ndó ña tuhún. Ña ndítahan nu ndó caja ndó quéa cañan ndó ña ndaa xihín ñani táhan ndó jáchi in nanduu ndihí cuéntá Jesucristo.

²⁶Ta tá jáa ndo xihín ñayivi coto a cája ndó cuachi jáchi xini ñúhú yaha yachi ña xójo ini ndó xihín ná. Ta tá sa nahini sa co ndítahan ndácaan ga ña xójo ini ndó xihín ná. ²⁷Ta a quiahva ndó ñamaní nuú tiñahá sacuahá ña ná caja rí ña cuni rí xihín ndo.

²⁸Ndá na nasacaja cuíhná jihna coto ná a cája cuíhná ga na viti. Ndítahan caja chúun vaha na ña ná cuu chindeé na na cámaní ñaha nuu.

²⁹A cáhan ga ndó tuhun núu. Ña ndítahan nu ndó quéa chindeé ndo ñayivi xihín tuhun cáhan ndó. Ta já cuu cuahnu na xihín á ña ná ñehe ná ñamaní nu Ndióxi. ³⁰A cája ndó ña ná cacuéha ínima yíi Ndióxi xihín ndo jáchi mé ínima yíi Ndióxi cán quéa náha ña mé a ndaa cúu ndó cuéntá mé á. Cúu á tátuhun nanani marca Ndióxi ndohó ña náha ña a jándacoo toho a ndohó janda quiahva ná xinu coo quivi tá chí in ndeé va jácacu Ndióxi ndohó.

³¹Xíní ñúhú tavá xóo ndó tóco ndihi ña núu, ña co sáhan ñamaní nu ndó canduu vaha xihín táhan ndó. Ta co ndítahan ja ndo xihín ñayivi ta ni co ndítahan cojo ini ndó. Ta co ndítahan cayuhú nu táhan ndó ta ni a cánahá ndó xihín ná. Ña ndítahan caja ndó quéa tavá xóo ndó mé ndó nu tóco ndihi ña núu. ³²Ña ndítahan caja ndó quéa ná caja vaha xihín táhan ndó ta candáhví ini táhan ndó. Ta caja cáhnu ini saha táhan ndó tá quiahva nacaja cáhnu ini Ndióxi saha ndó sahá ña nacaja Jesucristo saha ndo.

Ña ndítahan caja na cúu jahyi Ndióxi

5 Mé ndó cúu ndójahyi máni Ndióxi sahá ña cán quéa ndítahan ndihi ini ndó caja ndó tá quiahva cája mé á. ²Xíní ñúhú quihvi ini ndó ñani táhan ndó tá quiahva nacaja Jesucristo. Naquihvi ini a mí ta nandiquiahva mé á quivi a ndica crúxu saha yo tátuhun in quítí, rí nasahní na joco na nu Ndióxi. Ta mé a ndaa nasacuu a ña nacajii ini Ndióxi xihín.

³Co cúní cuni johó i ña cája ndó cuachi tátuhun tá íin in ñayivi xihín ñájíhí á yíi ñani táhan na á tá cája na ña núu xihín yiquí cuñu na á tá chínúu na ínima ná jatá jiuhún na. Co ndítahan nu ndó caja ndó ña yóho jáchi cúu ndó na cúu cuéntá Ndióxi viti. ⁴Coto a cáhan ndó ña núu ña coo saha. Ta ni a ndítuhún jiquí xihín táhan ndó xihín tuhun núu. Jáchi co cája vaha toho ña yóho xoho. Ña ndítahan caja ndó quéa ndiquiahva ndó ndixahvi nu Ndióxi. ⁵Jáchi sa cándaa ini ndó ña ndá na ndúu xihín na co cúu ñájíhí na á yíi ná, á tá cája na ña núu xihín yiquí cuñu na á tá cúu ná na chínúu ínima jatá jiuhún, mé na cán a ñehe táhvi toho na cacomí Jesucristo xihín Ndióxi cuéntá saha ná. Jáchi na chínúu ínima jatá jiuhún cúu ná tátuhun na cája cáhnu yoco. ⁶A cándusa ndó caja ndó cuachi cája na jan jáchi cúní na jándahvi na ndohó xihín ña tuhún. Jáchi cúu ná ñayivi sáá ini, na jácojo ini Ndióxi. Ta tandaa quivi jándoho a ini na cán. ⁷Sahá ña cán quéa co ndítahan ndique táhan ndó caja ndó ña núu xihín na jan.

⁸Mé ndó nasanduu ndó nuú naá ndivaha jihna joo sahá ña in nanduu ndó xihín Jesucristo ndúu ndó nu yéhe viti. Sahá ña cán quéa ndítahan caja vaha ndó já ná náha ña mé a ndaa cúu ndó ñayivi mé á, na xíca nu yéhe. ⁹Jáchi tóco ndihi na ndúu nu yéhe cája na ndinuhu ña vaha ta xíca ndacú na íchi cuéntá ña ndaa. ¹⁰Xíní ñúhú jácuaha ndó caja ndó ña cájii

ini Ndióxi xihin. ¹¹A catáhan ndó xihín ñayivi ndúu nuú naá yávi ta a cája ndó ña núu xihin ná, ña co ndáyahvi. Ña ndítahan caja ndó quea jánani ndó na ta nahá tuhun ndó sahá ña núu cája na. ¹²Jáchí chínuú cacahan nuu yo nditúhún yo sahá ña cája jehé na jan. ¹³Joo tá ná xinu quiví canáha ndihi ña cája na jan já canda ini tóco ndihi ñayivi ña nacaja jehé na. Jáchí tóco ndihi ña ñúhu jehé quee ndihi a nu yéhe. ¹⁴Sahá ña cán quea já cáchí tuhun Ndióxi já:

Xíní ñúhú ndicáxi inún jáchí cúun tátuhun da quíji tañu na naxihí.

Ta tá ná ndicáxi inún já jándiyehé Jesucristo ínimun já ná a cájún cuachi, cáchí tuhun Ndióxi.

¹⁵Xíní ñúhú candehé vaha ndó ndá quiahva ndítahan caja ndó. A cája ndó tá quiahva cája ñayivi co xíní túní. Ndítahan cacuu ndó ñayivi ndíchí jini. ¹⁶Xíní ñúhú ndihi ini ndó caja ndó ña cúní Ndióxi jáchí quini ndivaha cáa tiempo viti. ¹⁷Coto a cája ndó ña tóntó. Xíní ñúhú ndicani vaha ini ndó sahá ña cúní Ndióxi, xitoho í caja ndó. ¹⁸A jáxini ndó mé ndó jáchí co cája vaha ña jan xihin ndó. Ña ndítahan caja ndó quea quiahva ndó ñamaní nu Ndióxi ña ná jándicutú a ínimá ndó xihín ínimá yíi mé á. ¹⁹Ta tá ná nditúhún ndó xíní ñúhú ndinuhu ini ndó caja cáhnu ndó Ndióxi, xitoho ndó xihín tuhun cáhan ndó. Xíní ñúhú cata ndó salmo xihín himno xihín canto, ña sáhan ínimá yíi Ndióxi nu ndó. Joo xíní ñúhú cacuu a ña quíxi ínimá ndó cája cáhnu ndó Ndióxi. ²⁰Níi tiempo ndítahan ndiquiahva ndó ndixahvi nu Ndióxi, tátá yo sahá tóco ndihi ñaha. Ta cáhan ndó quiví Jesucristo, xitoho í tá ná caja ndó ña.

Ña ndítahan caja na sa natandaha

²¹Ndítahan nu ndó candúsa táhan ndó já ná cuu ndicáhnu Ndióxi sahá ña cája ndó.

²²Ndóhó, najihí ndúu yíi ndítahan candúsa ndó yíi ndó tá quiahva cándúsa ndó Jesucristo, xitoho í. ²³Jáchí yíi ndó cúu da cómí cuénta saha ndó tá quiahva cómí Jesucristo cuénta sahá na ndíco íchí mé á. Ta tóco ndihi na cúu cuénta mé á cúu ná na ndáca tátuhun yiquí cuñu mé á. Ta mé á quea jácacu a na nuú cuachi. ²⁴Tá quiahva cája na cúu cuénta Jesús cándúsa na ña sáhdá mé á nu ná quiahva já ndítahan caja najihí ndúu yíi. Xíní ñúhú caja ndihi na ña cúní yíi na caja na.

²⁵Ta ndóhó, da ndúu ñájihí, xíní ñúhú quihvi ini ndó na tá quiahva naquihvi ini Jesucristo na cúu cuénta mé á tá naxihí a saha ná. ²⁶Nacaja Jesucristo ña yóho jáchí cúní mé á ña ná nduu na cúu cuénta mé á ñayivi vií sahá ña nandoo na xihín ticuí ta sahá ña sácú vaha na ña cáchí tuhun Ndióxi. ²⁷Sahá ña cán quea cuu cayati na nu Ndióxi sahá ña cúu ná ñayivi vií cuénta mé á, na naquee vaha xihín ña núu, na co jácaquini mé xihín

cuachi. Ta viti cúú ná ñayivi yíi nū mé á jáchi cō cája ga nā cuachi.

²⁸Ndítahan nuú in dataa quíhvi ini da ñájíhí da tá quiahva quíhvi ini da yiquí cuñu da jáchi in nanduu na. Tá quíhvi ini da ñájíhí da já quéa quíhvi ini da mé dá. ²⁹Jáchi ni in túhún toho ñayivi cō cándají nā yiquí cuñu na. Ña cája na quéa sáhan na ña cuxu a ta ndáa vaha na ña ta quiahva já ndáa Jesucristo nā cúú cuéntá mé á. ³⁰Jáchi tóco ndihí mí, nā cúú cuéntá Jesús cúú yó java nā ndáca yiquí cuñu mé á. ³¹Sahá ña cán quéa cáchí tuhun Ndióxi já: “Tá ná tandaha in dataa já ndítahan quee xóo da nū tátá náná da já ná ndique táhan da coo da xihín ñájíhí da. Ta já ná nduu ndívi nā tátuhun in túhún jini ñayivi”, cáchí tuhun Ndióxi. ³²Mé a ndaa yáncá ndivaha cándaa ini tóco ndihi ña yóho. Joo náha nū yō ndá quiahva cúú yó tátuhun yiquí cuñu Jesucristo tá in nanduú xihín á. ³³Xíní ñúhú ndicuhun ini ndó ña ndítahan quíhvi ini in in ndó ñájíhí ndó tá quiahva quíhvi ini ndó mé ndó. Ta jári ndóhó, najihí xíní ñúhú caja cáhnu ndó yíi ndó.

6 Ndóhó, nā valí xihín nā tacú, xíní ñúhú coo johó ndó nū sáhndá tátá náná ndó chuun nū ndó. Jáchi ña yóho quéa cúni Ndióxi caja ndó. ²Xíní ñúhú caja cáhnu ndó tátá ndó ta caja cáhnu ndó náná ndó jáchi jihna ñúhú nasahnda Ndióxi ña yóho nū yó caja í. Ta jatá ña yóho nasahan mé á tuhun a nū yō tá cáchí a já: ³“Tá ná cajún ña yóho já cuahnu yatún ta quixi cuahá ña vaha nuun.”

⁴Ta ndóhó, nā ndúu jahyi, a jácojō ndó ini jahyi ndó. Ña ndítahan caja ndó quéa jánaḥa vaha ndó nū ná ña ndítahan caja na. Ta jánaḥa ndó nū ná ndá quiahva caca na íchi cuéntá Ndióxi, xitoho í.

⁵Ta ndóhó, nā naxeen nā caja chúun nū ná xíní ñúhú coo johó ndó nū cáhan xitoho ndó, nā cómi cuéntá saḥa ndó ñuyívi yóho. Ta ndítahan caja cáhnu ndó nā ta cayihví ndó nā. Joo xíní ñúhú caja ndó ña xihín ndinuhu ini ndó jáchi cúú á tátuhun cája chúun ndó nuú Jesucristo.

⁶Ndítahan nū ndó caja chúun vaha ndó nū ná ta a juú tá ndíta cuití nā sándeḥé nā nū cája chúun ndó sahá ña cúni ndó candoo vaha ndó nuú nā cán, vaha. Ndítahan caja chúun ndó xihín ndinuhu ini ndó nuú xitoho ndó jáchi cúú á tátuhun cája chúun ndó nuú Jesucristo. Sahá ña cán quéa ndítahan caja ndó ña cúni Ndióxi xihín ndinuhu ini ndó. ⁷Xíní ñúhú cajii ini ndó ta ndinuhu ini ndó tá cája chúun ndó. Ta ndítahan caja ndó cuéntá ña cája chúun ndó nū Ndióxi ta cō cája chúun ndó nuú ñayivi cuití va.

⁸Jáchi sa cándaa ini ndó ña vaxi quívi xinu yó nuú Jesucristo, xitoho í ndiquehé yahvi sahá ña vaha nacaja í ñuyívi yóho. Ta cō cō caja toho a á cúú yó xitoho á cúú yó nā cája chúun nuú xitoho.

⁹Ta jári ndóhó va, nā cúú xitoho mozo naxeen ndó jan ndítahan nū ndó caja vaha ndó xihín ná ta cō ndítahan jáyihví ndó nā xihín tuhun cáhan

ndó xihín ná. Ndítahan ndicuhun ini ndó ña íin Jesucristo indiví ta cúú á xitoho mé ndó ta sa mé á cán cúú xitoho na cája chúun xihín ndo. Ta co sáhní toho a cán mé á saha ndá ñayivi íin chága saha a juú ga inga na jáchi in cúú ndihí nu mé á.

Ndaja caja í quee vaha í xihín ña quini

¹⁰Ta viti xíní ñúhú caja ndacú ndo mé ndó xihín ndée cáhnu Jesucristo, xitoho í jáchi in nanduu ndó xihín mé á viti. ¹¹Xíní ñúhú caja chúun ndó xihín tóco ndihi ndée sáhan Ndióxi nu ndo já ná cuu quee vaha ndó xihín tiñáhá sacuahá tá cúní rí jándahví rí ndohó. ¹²Jáchi a juú xihín ñayivi, na íin yiquí cuñu cáni táhan í, vaha. Ña cáni táhan í xihín cúú tátó tiñáhá sacuahá, rí xíca nuu nu táchi indiví ta rí cán cúú rí rí cómí cuéntá sahá ñayivi ndúu nuú naá yávi ñuyívi yóho. ¹³Sahá ña cán quea xíní ñúhú caja chúun ndó xihín tóco ndihi ndée sáhan Ndióxi nu ndó já quea ná cuu quee vaha ndó xihín rí quini tá ná xinu rí caní táhan rí xihín ndo. Ta xihín ña yóho cuu candita ndacú ndó tá sa nandihí nacani táhan ndó xihín rí. ¹⁴Ta candita ndacú ndó xihín ña ndaa ña sáhan Ndióxi nu ndo jáchi cúú á tátuhun in cinturón pañi tixi sáhan ndée ndácaan tóco ndo. Ndicuhun ini ndó ña cúú ndó ñayivi ndaa nu Ndióxi. Sahá ña cán quea cúú á tátuhun ndíxi ndó cotó caa. ¹⁵Xíní ñúhú canduu tiahvá ndó cahan ndó tuhun vaha sahá Jesús xihín ñayivi jáchi tuhun yóho quea cája ña ná coo vaha ini na xihín Ndióxi. Sahá ña cán quea cúú á tátuhun yíhi ndó tuhun Ndióxi. ¹⁶Xíní ñúhú candeé ini ndó Ndióxi já quea ná cuu quee vaha ndó caji nuu ndó nuú ña núu cúní tiñáhá sacuahá chindahá rí nu ndo. Sahá ña cán quea cúú á tátuhun ñéhe ndó in caa jáhndá ña chícají a ndohó. Ta xihín mé ña yóho cuu candaji nuu nu ndo nuú ña ñéhe ñuhú ita jácana mé rí cán nu ndo. ¹⁷Ndicuhun ini ndó ña najácacu Ndióxi ndohó nuú cuachi sahá ña cán quea cúú á tátuhun ñúhu ndó yíjini caa. Tá ná cahan cáxi ndó tuhun sáhan ínima yíi Ndióxi nu ndó já quea cúú á tátuhun ñéhe ndó machiti, ña cúú tuhun Ndióxi. ¹⁸A jándacoo ndó caca tahví ndó nu Ndióxi. Níi tiempo xíní ñúhú caca tahví ndo nu mé á. Joo ndítahan caca ndó ña jánahá ínima yíi mé á nu ndo caca ndo. Xíní ñúhú canduu tiahvá ndó ta a cáva ini ndó ta xíní ñúhú caca tahví ndó saha tóco ndihi na cúú cuéntá Ndióxi. ¹⁹Ta caca tahví ndó nu Ndióxi saha mí i viti já ná chindeé Ndióxi yehe cahan i xihín ñayivi tuhun mé á ta caca tahví ndó nu á ña ná quiahva mé á ndée a nuú i já ná cuu cahan i tuhun mé á ña coó nasaxíni na jihna, nduu. Jáchi ña yóho quea cuu jácacu a na nuú cuachi. ²⁰Ndióxi quea nachindahá a yehe cuhun i cahan i tuhun yóho ta sahá ña xíca i cahan i tuhun yóho ndácaan i vecaa viti. Caca tahví ndó sahá i já ná a cáyihví i cahan i sahá Jesús nuú ñayivi ndúu yóho tá quiahva ndítahan nuú i caja i.

Ndíndayí Pablo ñayivi, na cúú cuéntá Jesús

²¹Ñani máni yo, da naní Tíquico mé a ndaa cúú dá da chindeé táhan xihín i chuun Jesucristo, xitoho í. Ta mé dá cán cañehe da tūhun sahá i tá ná saa da nu ndo já ná candaā ini ndó ndátahvi yáha i. ²²Sahá ña cán chindahá i da nu ndo já ná caxi tūhun da nu ndó ndá quiahva yáha nde ndúu nde yóho ta xihín ña yóho ná cuu quiahva da tūhun ndeé ini ndó.

²³Ña cúni quéa ná caja Ndióxi, tátá yo xihín Jesucristo, xitoho í ña ná coo vaha ini tóco ndihi ndó, na cúú cuéntá Jesús. Ta ná caja mé á ña ná quihvi ini táhan ndó sahá ña cándeé ini ndó mé á. ²⁴Ta ná jándicutú ndaa mé á ñamaní jata tóco ndihi na quihvi ini Jesucristo, xitoho í xihín ndinuhu ini na. Já ná coo.